

दिनांक 03.07.2024
समय: 18.45 बजे

आकाशवाणी जयपुर–अजमेर प्रादेशिक समाचार ।

- विधानसभा रो दूजो सत्र आज सरु व्हयो–10 जुलाई ने सदन मांय पूरो बजट पेश कर्यो जावेला ।
- प्रदेश रा आकांक्षी जिलां अर ब्लॉक्स मांय काल 'सम्पूर्णता अभियान' सरु कर्यो जावेला ।
- सब इंस्पेक्टर भर्ती परीक्षा–2021 समेत न्यारी–न्यारी परीक्षावां रा पेपर लीक करण रा मामलां मांय तीन ईनामी आरोपित पकड़ी ज्या ।
- प्रदेश मांय केई ठौड़ां बिरखा व्ही–आवता दो–तीन दिन केई जिलां मांय तेज बिरखा रा आसार ।

000

विधानसभा रो दूजो सत्र आज सरू व्हयो। आज संवारे 11 बज्यां सदन री कार्यवाही सरू व्हेतां ई विपक्ष रा नेता टीकाराम जूली राज्यपाल रा अभिभाषण री मांग कीनी। ई परां सत्ता अर विपख रा सदस्यां बीचे तीखी नोंक—झोंक व्ही। विपख रा सदस्यां री ओर ऊं उठायी ज्या मुद्दां माथे विधानसभा अध्यक्ष वासुदेव देवनानी कह्यो के व्यवस्था रे मुजब विधानसभा रा पहला अर हर साल रा पहला सत्र मांय राज्यपाल रो अभिभाषण व्हेवणो ज़रूरी व्हे है। देवनानी कह्यो के ओ सदन रो ई साल रो दूजो सत्र है। ई पाछे विधानसभा अध्यक्ष बागीदौरा ऊं नुवा चुणी ज्या विधायक जय कृष्ण पटेल ने शपथ दिरायी। सदन मांय राज्यपाल कानी ऊं मंजूर करी ज्या विधेयकां री जाणकारी दीरीजी। मुख्य सचेतक कार्य सलाहकार समिति री रपट सदन सामी पेश कीनी। देवनानी ओम बिरला रे ओजू लोकसभा अध्यक्ष चुण्या जावण ने प्रदेश सारू माथो ऊंचो करण वाळी बात बतायी। देवलोक व्ही बारह विभूतियां ने सदन मांय श्रृद्धांजलि दीरीजी। ई पाछे सदन री कार्यवाही काल तांई टाळ दीरीजी।

000

राज्य री भजनलाल शर्मा सरकार रो पहलो पूरो बजट 10 जुलाई ने पेश कर्यो जावेला। विधानसभा मांय काल प्रश्नकाल अर शून्यकाल री कार्यवाही व्हेला। ई सागे ई रीको अर राजस्थान कॉ—ऑपरेटिव डेयरी फेडरेशन री सालाना रिपोर्ट माथे विचार कर्यो जावेला। 5 ऊं 9 जुलाई तांई विधानसभा री कार्रवाई नी व्हेला। 10 जुलाई ने बजट पेश कर्यो जावेला।

000

प्रदेश रा आकांक्षी जिलां अर ब्लॉक्स मांय काल सम्पूर्णता अभियान सरू कर्यो जावेला। 5 आकांक्षी जिलां सागे 27 आंकाक्षी ब्लॉक्स मांय सितम्बर तांई ओ अभियान चलायो जावेला। इण रो मकसद स्वास्थ्य, पोषण, शिक्षा, कृषि अर सामाजिक विकास रा सूचकांक ने सौ फीसदी हासिल करणो है। नीति आयोग ई अभियान सारू हर जिला अर ब्लॉक मांय वां रा नुमाइन्दा भेज्या है।

बाड़मेर रा जिला कलेक्टर निशांत जैन आकाशवाणी सागे बातचीत मांय बतायो के ई अभियान रा तहत जिला रो रामसर ब्लॉक चुणी ज्यो है।

.....

अभियान री सरूआत रे मौके काल ऊं दो दिन ताई खास कार्यक्रम राख्या जावेला। कोटपूतली—बहरोड़ रा नीमराणा मांय संपूर्णता अभियान शिविर लगायो जावेला। म्हाणा सवाईमाधोपुर खबरनवीस बतायो के अभियान रा तहत गंगापुर सिटी मांय स्वास्थ्य, कृषि, शिक्षा अर समाज कल्याण समेत न्यारा—न्यारा महकमां री ओर ऊं स्वास्थ्य जांच अर पोषाहार वितरण रा कार्यक्रम राख्या जावेला।

झालावाड़ ज़िला री खानपुर पंचायत समिति मांय ई अभियान सारू नोडल अधिकारी लगायी ज्या है।

000

राजस्थान धरोहर प्रोन्नति प्राधिकरण रा अध्यक्ष औंकार सिंह लखावत कह्यो है के देश री आजादी सारू जान देवण वाळां ने मान देवण अर 1857 री आजादी री लड़ाई मांय योगदान देवण वाळा गांवां ने 'स्वातंत्र गांव' घोषित कर र वठे स्मारक बनाया जावेला। लखावत आज बूंदी मांय प्राधिकरण री ओर ऊं बनाया जा रह्या बूंदा मीणा पैनोरमा रा काम री जाणकारी लीनी। वे कह्यो के इतिहासकारां ऊं 1857 री आजादी री लडाई मांय योगदान देवण वाळी हाड़ौती री ठौड़ां री जाणकारी ले र काम कर्यो जावेला।

000

सब इंस्पेक्टर भर्ती परीक्षा—2021 समेत 6 ऊं बत्ती भर्ती परीक्षावां रा पेपर लीक करण रा मामलां मांय तीन खास आरोपितां ओमप्रकाश ढाका, सुनील बेनीवाल अर सम्मी बिश्नोई ने पुलिस गिरफ्तार कर लीना है। जोधपुर पुलिस खास अभियान चला र गिरफ्तार करी ज्या आं आरोपितां ने एसओजी ने सूप दीना है। एसओजी रा अतिरिक्त पुलिस महानिदेशक वी के सिंह आज जयपुर मांय खबरनवीसां सागे बातचीत करता थकां आ जाणकारी दीनी। वे बतायो के आं आरोपितां माथे पुलिस ईनाम रो ऐलाण कीनो हो। जोधपुर रेंज रा पुलिस महानिरीक्षक विकास कुमार बतायो के ढाका अर बेनीवाल ने हैदराबाद ऊं पकड़ी ज्या जद के सम्मी बिश्नोई ने बरसाना ऊं गिरफ्तार करी ज्यी।

पुलिस आं तीन ई आरोपितां ने अदालत मांय पेश कर र 15 दिन री रिमांड मांगी। ध्यानजोग है के ओमप्रकाश ढाका माथे 75 हजार, शम्मी

बिश्नोई माथे 70 हजार अर सुनील बेनीवाल माथे 25 हजार रुप्या रा ईनाम रो ऐलाण करी ज्यो हो। न्यारी—न्यारी भर्ती परीक्षावां रा पेपर लीक करण रा मास्टरमाइंड आं आरोपितां ने राजस्थान पुलिस लम्बा बगत ऊं तलाश रही ही।

000

राज्य मांय प्रदूषण नियंत्रण मंडल री ओर ऊं 20 लाख ऊं बत्ता पौधा रोप्या जावेला। राज्य प्रदूषण नियंत्रण मंडल रा सदस्य सचिव एन. विजय आ जाणकारी दीनी। वे बतायो के जनता अर खुद सेवक संस्थावां री मदद ऊं खास तौर ऊं कारखानां अर आरे—सारे रा हलकां मांय अ पौधा लगाया जावेला।

0000

प्रदेश मांय आज ई केई ठौड़ां बिरखा व्ही। सीकर, झुंझुनू, दौसा, सवाईमाधोपुर, टोंक, भरतपुर, करौली, कोटा, बारां, भीलवाड़ा अर झालावाड़ा जिलां मांय बिरखा रा समाचार है। नीम का थाना मांय चोखो मेह बरस्यो। राजधानी जयपुर रा केई हलकां मांय सिंज्यां री पोर चोखी बिरखा व्ही। चूरु मांय काल व्ही बिरखा रे कारण भर्यो पाणी हाल ई नी निकाळ्यो जा सक्यो है। मौसम विभाग रे मुजब राज्य रा ऊगणी हलकां मांय कठे—कठे बिरखा मांय बधोतरी रा आसार है। महकमा रे मुजब आवता दो—तीन दिन जयपुर, भरतपुर, कोटा अर उदयपुर संभाग मांय कठे—कठे बिरखा व्हेवण रा आसार है। जयपुर, भरतपुर अर कोटा संभाग मांय कठे—कठे जोरदार बिरखा व्हेवण री संभावना है।

बीकानेर संभाग मांय आवता 48 घंटां मांय कठे—कठे बादळां री गरज अर जोरदार बायरो बाजण सागे बिरखा रा आसार है। दूजी कानी जोधपुर संभाग रा घणखर हलकां मांय आवता तीन—चार दिन मौसम साफ रहवण री संभावना है।

000

कानून री भणार्ई करण वाळां सारू राजस्थान राज्य मानवाधिकार आयोग री ओर ऊं 21 दिन रो राष्ट्रीय स्तर रो इंटरनेशिप कार्यक्रम आज सरू करी ज्यो। इण रा उद्घाटन जळसा मांय आयोग रा सदस्य न्यायाधिपति राम चंद्र सिंह झाला कह्यो के कोई ई खुद, डाक ऊं, ऑनलाइन या किण ई दूजा तरीका ऊं मानवाधिकार आयोग मांय मुफ्त शिकायत दर्ज करा सके है।

000

भरतपुर रा केवलादेव राष्ट्रीय घना पक्षी अभ्यारण्य कने बेगो ई जैविक उद्यान बणायो जावेला, जठे शेर, बाघ, तेंदुआ, घड़ियाल अर मगरमच्छ सरीखा जिनावर देख्या जा सकेला। केवलादेव उद्यान रा वन अधिकारी मानस सिंह बतायो के जैविक उद्यान बण्यां पाछे सैलाणियां ने लोहागढ़ किला, संग्रहालय, जवाहर बुर्ज ,बिहारी जी मंदिर, श्रीगंगा महारानी मंदिर ,विश्व प्रिय शास्त्री पार्क अर बेटी पार्क सागे जैविक उद्यान री सैर करण रो मौको मिलेला। ध्यानजोग है के गुजर्या ज़माना मांय केवलादेव उद्यान कने तेंदुआ अर बाघ निज़र आता हा। मौजूदा दौर मांय केवलादेव अभ्यारण्य मांय रोज़ड़ा, चीतल, सांभर, जंगली सूअर, सियार अर जरख मौजूद है।

000

जैसलमेर मांय पल्स पोलियो टीकाकरण अभियान मांय लक्ष्य रे मुजब 100 फीसदी उपलब्धि हासिल करी ज्यी है। ज़िला प्रजनन अर शिशु स्वास्थ्य अधिकारी डॉ. नारायण राम बतायो के दीतवार ने पोलियो बूथ माथे अर वां पाछे 2 दिन तांई 5 साल तांई रा बच्चां ने घर-घर जा र पोलियो ऊं बचाव री दवा री खुराक पायी ज्यी। आं तीन दिन मांय 1 लाख 32 हजार बच्चां ने आ दवाई पायी ज्यी।

000